

თბილისი, ვ. ი. ლენინის სახელობის „დინამოს“ სტადიონი. 22 ივნისი.

„დინამო“ (თბილისი) – „ჩერნომორეცი“ (ოდესა) 0:2 (0:0).

„დინამო“: გაბელია, კეტაშვილი, არზიანი (გოგრიჭიანი, 61), ჭელია, კუდინოვი, გურული (უგრელიძე, 78), სვანაძე, მახარაძე, ცაავა, გაზაფვი, მესხი.

„ჩერნომორეცი“: გრიშკო, ჟარკოვი, გაიდარუი, საველიევი, სკრიპნიკი, პლოსკინა, პერეპადენკო, ფინკი, სეკინაევი (პასულკო, 67), იურჩენკო, მოროზოვი (სმოტრიცი, 85).

მსაჯი ოლეგ ჩინიონოვი (მოსკოვი)

გოლები: ჟარკოვი (70), პასულკო (77).

გაათრთხილეს იურჩენკო.

ამ მატჩისგან არავინ ელოდა რაღაც განსაკუთრებულს. მით უმეტეს, ისეთს, მსოფლიო ჩემპიონატის დღეებში რომ მოხიბლავდა ქომაგებს. მაგრამ ნებისმიერი ჭეშმარიტი გულშემატკივარი თავისი ბუნებით ოპტიმისტია და გულის სიღრმეში მაინც ჰქონდა იმედი, რომ საინტერესო მატჩის მოწმე გახდებოდა. მაგრამ ეს იმედი, როგორც თვით თამაშმა გვიჩვენა, საფუძველს მოკლებული ყოფილა.

მსოფლიო ჩემპიონატთან შედარება ვის ახსოვდა. გუშინდელი შეხვედრის მონაწილეებმა ვერაფრით გაახარეს მაყურებელი. თუმცა, ეს უფრო თბილისელ ფეხბურთელებზე ითქმის – ოდესელებმა ხომ ორი ქულა ჩაინერეს აქტივში და, ამდენად, მთლად უკმაყოფილო არ უნდა დაბრუნებულიყვნენ შინ. მასპინძლებმა ყოვლად უფერულად, უღიმღამოდ და უსუსურად ჩაატარეს მატჩი, რომლის მნიშვნელობაზე ლაპარაკი ზედმეტად მიგვაჩნია. საკუთარ მოედანზე დაკარგული ორი ქულა იმაზე მიგვანიშნებს, რომ მომავალში, სტუმრად ჩასატარებელ შეხვედრებში დინამოელებს კიდევ უფრო გაუჭირდებათ თავიანთი მარაგის შევსება. მაგრამ საქმე მართლ მოგება-წაგება როდია. მარცხისგან არავინ არის დაზღვეული და ეს ყველას კარგად გვესმის. სხვა თუ არაფერი, სპორტის ძირითადი კანონის თანახმად, ერთი გუნდი ან ერთი სპორტსმენი მეორეზე ძლიერი ან სუსტია. ვფიქრობთ, დინამოელთა მისამართით საყვედური არავის დასცდებოდა, მათ რომ ძლიერ მეტოქესთან ღირსეულ ბრძოლაში წაეგოთ მატჩი. მაგრამ საქმე ის არის, რომ თბილისელთა მოქმედებაში მოგების სურვილიც არ იგრძნობოდა. უამისოდ კი შეუძლებელია წარმატებაზე ფიქრი. არა მგონია, ჩვენი ფეხბურთელების გასამართლებლად გამოდგეს ის ფაქტი, რომ შეხვედრაში მონაწილეობა არ მიუღიათ გუნდის ლიდერებს ჩივაძე, სულაქველიძეს, შენგელიას, გუცაევსა და ჩელებაძეს. ამ ცნობილ ოსტატთა პარტნიორებს საკმარისი გამოცდილება აქვთ საიმისოდ, რომ საკუთარ მინდორზე „ჩერნომორეცთან,, თამაში შეძლონ. არადა, მთელი მატჩის მანძილზე მასპინძლები სულ ორჯერ დაემუქრნენ მეტოქის კარს: 53-ე წუთზე გურულის დარტყმა სტუმართა მეკარემ კუთხურზე მოიგერია. 65-ე წუთზე კი მესხმა თავით ხელსაყრელი მდგომარეობიდან ააცდინა მიზანს ბურთი.

ოდესელთაგან ყველაზე შესამჩნევი ფიგურა იყო უარკოვი. პირველ ტაიმში მისი ზუსტი გადაცემის შემდეგ ფინკმა ძელს მოარტყა ბურთი, მეორე ტაიმის დასაწყისში გაბელიამ კუთხურზე მოიგერია მისი ძლიერი დარტყმა. 70-ე წუთზე კი მანვე გახსნა ანგარიში: გურულმა და ჭედიამ შეუთანხმებლად ითამაშეს და უარკოვმა მათ წამით დაასწრო – 1:0. შვიდი წუთის შემდეგ თავი გამოიჩინა პასულკომ, რომელიც კარგად გავიდა თბილისელთა კართან და ზუსტადაც დაარტყა – 2:0.

დავით კაკაბაძე
ლელო 24.06.1986